

Vunn de Nistkäsde

Jetzt giehts los, ess werrd Friebling, villeischd. Awwer er kimmt und doo isses gut, sich e bissi druff oizestelle. Weil doo duts nitt long dauern unn die Veeschelscher dun nitt nor singe, naa, die wolle aach Eier leesche unn Junge hawwe.

Unn doodebei will ich helfe unn habb moin Kummbeer Schorsch oogerufe. Schorsch, habb isch gesaad, wolle merr nitt sesomme su e paar Voochelheisjer baue? Isch habb su e Ooleidung deferr in de Zeidung geseh unn doodenooch kennde merr ...

De Schorsch hott mich unnerbroche: Honnes, was glaabsde, was isch heit moie gedenkt habb: Ei grad dess sellwe wie du, isch misst enn Nistkäsde baue. Isch habb aach schunn geguggd, e paar Bretter habb isch noch unn moi Seesch iss ...

Jetzt habb isch gefroochd: Doi Seesch, also deine Säge ...

De Schorsch hott gebrummelt: Moi Seesch iss aach noch ze gebrauche unn doo kenne merr aach bald mett Baue oofonge. Donn kimmsde omm Mittwoch um Drei bei mich unn donn schneide unn klewe merr su zwaa Nistkäsde zesomme. Alles klar?

Naa, saach isch, ferr was ferr Veeschel wolle merr die donn baue?

Ei ferr Meisjer, dut de Schorsch ze Antwort gewwe, isch waaß warum du frooche dust, weesche dem Oifluchloch.

Ja, saach isch, in dere Ooleidung stieht, dass ferr Kohlmeisjer dess Loch enn Dorsmesser vunn zwaaunndreißisch Millimeter hawwe muss, isses klenner odder greeßer, giehn onnern Veeschel enoi. Zum Beispill ferr e Rotschwänzje missde merr dess Loch finfunnferrzisch Millimeter im Dorsmesser mache

De Schorsch druff: Dess iss doch komisch, odder? Isch kennt merr denke, dass wenn dess Loch ze kloo iss, doo kann dess Meisje gar nitt erst enoi. Awwer wenns Loch greeßer iss, giehts Meisje aach nitt enoi, weils waaß, dasses nitt long dauert bis enn onnern unn greeßere Voochel enoimächt unn ess verjaache dut. Dess iss doch indressond, odder?

Ja, saach isch, awwer su Meisjer hawwe halt e Erfahrung vunn Millione vunn John in ihm Kobb, dess iss bei dene droi, also wisse se dess.

De Schorsch seet: Gugg emol bei de Störch, die Junge vunn dene kenne gons alloo nooch Afrika fliesche, die hawwe die Fluuchstreck schunn im Nest in ihm Kobb kriegt.

Isch habb emm zugestimmt. Ja, dess iss su. Awwer junge Kraniche hawwe dess nitt im Kobb, die misse die Zuuchstreck erst kennelerne unn dessdeweesche fliehn die mett ihre Eltern im Oktower odder im November, saache merr mol vunn Schwede aus, nooch ihre Winderquadiern in Spanien. Weil im Friejhohr die junge Kraniche erst e Weil nooch de alte Kraniche zurickflieh misse se sich schunn uffem Hiehweesch alles gemerkt hawwe, um widder nooch Schwede ze kumme. Beim Fluuch im nächsde Herbst hawwe die Junge ess leichter, die fliehn in emm grüße Schwarm mett unn lerne doodebei noch ebbes dezu. Schließlich misse se joo wennse sellwer Junge hawwe dene de Weesch zeiche kenne.

De Schorsch hott gegrinst: Su vill Bretter, um su emm Kranich enn Nistkäsde ze baue, habb isch awwer nitt.

No ja, saach isch, donn baue merr halt zwaa Nistkäsde ferr die Meisjer.

Eiern Honnes